

E mundo 'politico' ta lora keto bay

No mucho tempo pasa mi a skirbi cu ora bo dicidi di bay riba lista, ta henter bo historial familiar ta wordo tira riba caya. Tambe mi a skirbi con figuranan popular ta ser busca pa aparece riba lista y pa atrae voto **"popular"** pa yuda e partido acumula mas voto.

Ayer a mi a hayami cu e tendencia nobo.

Ora bo keda sin bin riba lista bo tambe ta saca paña sushi di bo **"ex coleganan"**, tira riba caya.

Mi a lesa lo siguiente: **"Ningun hende por bisa di mi, cu mi a bebe burachi, cu mi a batí un ser femenino, cu mi a horta placa di hende, cu mi a comete hit & run, cu mi a core cu dos auto cu mesun number, trece dominicano aki pa core campaña, y otro tipo di infraccion". Mi a lesa di e mes declaracion aki, den otro corant cu a menciona, "falsificador di diploma, comete desfalco"** cu lo a sali hunto cu e lista menciona.

Meneer a bisa di lo sigui den politica y cu ainda e ta cu su partido cu a lague for di lista.

Mi ta kere cu aki si el a kima su dede cu su ponencianan, pasobra si ami tabata tin un partido y esaki a pasa, mi lo bisa cu **"den mi partido, si bo tabata miembro, y a expresa tal cosnan contra mi hendenan riba lista, cu tabata bo coleganan, mi lo no acepta bo mas den mi partido, ni con bon bo ta pretende di a traha."**

Un cos ta sigur. Si encaso e shon aki subi otro lista mañan, nunca e por wordo tilda di ta bulador di cura.

E no a bula cura. Ta tira el a wordo tira over di cura.

POPULARIDAD RIBA LISTA POLITICO.

Ora bo ta hoben, y cu bo ta popular, bo ta **"haz pa captura votadornan"** pa bo capitan di **"barco di pisca voto"**.

Riba lista di **D.R.** di Andin Bikker, mi a mira 12 di e personahenan popular. Esta cu ami ta considera como personahenan popular.

Mayoria no ta den posicion di bira ministro ni parlamentario, segun nos sistema di votacion. Pero si e partido aki kibra cu e sistema bieu y manda esnan cu ricibi mas tanto voto pa nan representacion, si nan logra dos of mas, ta tur tin mes posibilidad.

Riba lista di **OLA** mi a ripara dos di e personahenan aki. Nan ta basta halto, pero no den posicion di drenta parlamento. Nan ta bon pa atrae voto y pa drenta, lo mester saca nan mes.

Riba lista di **Alianza/MSA** mi a mira un cara nobo popular cu mester mula pa logra voto.

Ta e **S** di MSA so a spantami, pasobra mi tin masha miedo di e palabra **"socialismo"** cu sigur no kiermeen **"social"**.

Den partido **AVP** bao di e prome 7 nan, mi a mira 7 figura popular cu ta riba puestonan di **"hala voto pa nos"**. Ta saca nan mester saca nan mes pa por drenta parlamento.

Den **PPA** for di candidato 5 bin abao, mi a mira mas bien personanan cu mester trece voto aden pa e prome dos nan por haya nan chens di ripiti den parlamento.

Otro oportunidad pa nan mi no ta mira, y dificil pa di candidato 2 bin abao, nan saca nan mes pa segura asiento den parlamento.

Den **MPA** mi a mirá 10 figura cu mi ta considera popular pa hala

voto, pero ta un lista bon balanza.

Mi no por bisa aki cu nan ta traha pa lider of nr.2 pasobra ta un lista nobo cu a sorprende.

Di partido **PPT-Summum Bunum** ta 8 candidato tin cu tin cu carga mas tanto awa den hemchi posibel pa yena lama. Principalmente si e hemchi tin buraco den dje.

Gregorio Wolff lo ripara awor con esnan cu el a lucha pe tanto aña ta aprecia su lucha pa nan. Esaki ta e barometer!

Riba partido **RED** despues di e prome 6 nan mi ta mira algun cara di personahe cu mi ta considera popular.

Di e partido aki mi no por bisa cu nan lo depende di popularidad, pasobra nan tin candidatonan inteligente y tin intencion di cambia e sistema.

Den **MEP** ta dos candidato popular mi a mira riba puestonan di **"trece bo voto pa mi"**. Aki tambe lo por mira kico popularidad lo haci.

"SATISFECHO" RIBA LISTA

Pa entregamento di lista, por a ripara e aña aki con na ultimo momento ainda ta yena candidato.

Di esaki tambe mi a comenta algun dia pasa, mustrando cu hasta na mesa di entrega di lista esaki ta pasando.

Con bo por ta "satisfecho" riba lista como personahe popular? Personahe "Satisfecho" tabata den negociacion cu **Mariana Patria Arubana**.

Pero no a dura mucho cu **"Satisfecho"** a cambia di opinion pasobra **Oleana Lamento Arubano** a yena caya cu auto y un batayon di auto a staciona dilanti cas di mama **"insatisfecho"**.

Tur cos a draai rond di cristianismo, religion, y otro ideologia e momentonan ey.

"Satisfecho" cu ta bon riba computadora pa traha musica, a traha jingle pa **Mariana Patria Arubana**. El a diseña como bon artista, e sticker pa **Mariana Patria Arubana**, y a diseña tambe T-shirt pa Mariana.

E dia prome cu entregamento di lista, a pesar di lo a bira lomba pa Mariana, pa sigui cu Oleana, toch el a indica di ta **"Satisfecho"** cu Mariana.

Pero e mes dia, den seno di Mariana a drenta caba e informacion cu **"Satisfecho"** ta pensando riba **Mariluz Elenita Pasadiya** y ta haya un auto y 15 mil florin.

Shon artista aki tabata asina conoci y popular cu hasta **Aurelia Venencia Piedro** tabata loco su tras pero no tabata tin auto pa regale.

Diabierna tur hende a haya **"shock"**.

Meneer masha **"Satisfecho"** a cana tras di lomba di su lider pa bay entrega lista. Su nomber tabata **"getyped"** riba e lista cu otro machine, y otro tipo di letter, compara cu e otro cu tabata di e mes tipo di letter.

Prome cu entregamento di lista, 4 or di madrugada, ainda e mama **"satisfecho"** y preocupa a yama **Mariana Patria Arubana** pa puntra **"unda su yiu ta"**. Lugar e yiu tabata cerca **Mariluz Elenita Pasadiya**, pasando anochi.

Dia 23 di september, wowo rond di Aruba lo ta buscando **"satisfaccion"** y pa na Hulanda nan politiconan expresa: **"Wij zijn heel satisfecho!!!"**

Juby Naar.